

# Rapports dad RTR equilibrads ed objectivs

■ **(cp) A chaschun da sia ultima sessida è il cussegl dal public SRG.R (CP SRG.R) s'occupà cun ils rapports da Radiotelevision Svizra Rumantscha (RTR) davart las votaziuns federalas 2015 ed ils bulletins da novitads.** En ses rapport fa la cumissiun ina bilantscha fitg positiva da las contribuziuns realisadas avant las votaziuns federalas. Ils rapports èn stads equilibrads ed objectivs. Medemamain persuadì han las emissiuns durant la dumengia da votaziun dals 18 d'october. L'offerta dad RTR è stada cumpletta e senza concorrenza. En spezial l'offerta online cun il dossier spezial è stada detagliada e fitg survesaivla. Attenziun speziala ha RTR era fatg a las atgnadads regiunalas e chantunalas en il Grischun. Quai dentant senza tralasar quai ch'è succedi politicamain en l'ulteriura Svizra.

## **Promover daplì ils chanals da social media**

La redacziun da giuventetgna «Battaporta» ha fatg intervistas frestgas e lucas e preschentà uschia las candidatas ed ils candidats da las partidas giuvnas. Il CP SRG.R beneventass dentant sch'ìls chanals da social media vegnissan optimads ed integrads anc pli fitg. Ultra da quai è il project «Politbox» vegnì reduci memia fitg sin l'app da la SSR, ed uschia è l'offerta supplementara fitg multifara vegnida in pau a la curta. Cumpareglia cun las emissiuns «Wahlfart» e «Wähler gesucht» dad SRF

èn las singulas emissiuns dad RTR stadas plitost tradiziunalas e pli pauc innovativas. Per finir po vegnir constatà che l'offerta dad RTR è stada fitg extendida e quasi cumpletta.

## **Bulletins da novitads dal Radio Rumantsch**

Il cussegl dal public SRG.R ha ultra da quai era prendì sut la marella ils bulletins da novitads dal Radio Rumantsch areguard lingua, dicziun, preschentaziun e stil. Leger rumantsch grischun chaschuna fadia als pli paucs preschentaders da novitads. Era la pronunzia clera e bain chapibla da la pli part dals preschentaders è vegnida validada sco positiva. Gist tar las novitads è il CP SRG.R plinavant da l'opiniun che la scolaziun e furmaziun dals collavurants en ils secturs da la lingua e dal discurren meritia attenziun speziala.

## **Perspectiva**

A chaschun da la seduta dal favrer 2016 s'occupa il CP SRG.R cun las emissiuns da musica «Las Perlas», «Soundcheck» e «La Classica». Questas emissiuns vegnan emessas mintgamai il venderdi, la sonda e la dumengia tranter las 19.00 e las 20.00 en il Radio Rumantsch. *Augustin Beeli* è sa retratg sco commember dal CP SRG.R per la fin dal 2015. Sia successura ubain ses successur vegn elegi a chaschun da la radunanza generala da la SRG SSR Svizra Rumantscha il 21 da matg 2016 a Cuira.